

陸
宣
正
奉
全
錄
一

THE CHINESE-JAPANESE LIBRARY
OF THE HARVARD-YENCHING INSTITUTE
AT HARVARD UNIVERSITY

MAR 1 1954

T 5307 / 2321

制
誥

唐權德輿先生原本

映旭齋藏

陸宣公奏議

致和堂梓行

唐陸宣公集敘

哈佛大學哈佛燕京圖書館藏

唐權德輿撰

嘗讀賈誼書觀其經制人文鋪陳帝業術亦至矣
之宣室恨得後時遇亦深矣然竟不能達四聰而盡
其善排羣議而試厥謀道之難行亦已久矣東陽絳
灌何代無之嘻一薰一蕕善齊去聲不能同其器方鑿
圓柄良工無以措巧心所以理世少而亂日多大雅
衰而正聲寢漢道未融既失之於賈傅吾唐不幸復
擯棄於陸公公諱贄字敬輿吳郡蘇人溧陽令偏之
子年十八登進士第應博學宏辭科授鄭縣尉非其

好也省母歸壽春刺史張鎰有名於時一獲晤言大
加賞識暨別鎰以泉貨數萬爲賚曰願以此奉大夫
人一日之膳公悉辭之領薪茶一串而已是歲以書
判拔萃調渭南簿本傳御史府以監察換之德宗皇
帝春宮時知名召對翰林卽日爲學士由祠部員外
轉考功郎中朱泚之亂從幸奉天時車駕播遷詔書
旁午公灑翰卽成不復起草初若不經思慮及成而
奏無不曲盡事情中於機會倉卒填委同職者無不
拱手歎伏不能復有所助嘗從容奏曰此時詔書陛
下宜痛自引過以感人心昔禹湯以罪己勃興桀紂

以善言復國陛下誠能不恡改過以言謝天下得
草辭無諱庶幾羣盜革心上從之故行在詔書始下
雖武人悍卒無不揮涕激發議者以德宗克平寇亂
不惟神武之功爪牙宣力蓋亦資文德腹心之助焉
及還京師李抱真來朝奏曰陛下在山南時山東士
卒聞書詔之辭無不感泣思奮臣節臣知賊不足平
也公自行在帶本職拜諫議大夫中書舍人精敏小
心未嘗有過艱難扈從行在輒隨啓沃謀猷特所親
信有時讜語不以公卿指名但呼陸九而已初幸梁
洋棧道危狹從官前後相失上夜次山館召公不至

泫然號於禁旅曰得陸贄者賞千金頃之公至太子親王皆賀初公既職內署母韋氏尚在吳中上遣中使迎至京師道路置驛文士榮之丁韋夫人憂去職持喪於洛遣人護漂陽之柩附葬河南上遣中使監護其事四方贖遺數百萬公一無所取素與蜀帥章南康布衣友善韋令每月置遺公奏而受之服闋復內職權知兵部侍郎覲見之日天子爲之興改容敘弔優禮如此內外屬望旦夕俟其輔政爲實叅忌嫉故緩之真拜兵部侍郎知貢舉得人之盛公議稱之貞元八年拜中書侍郎平章事公以少年入侍內殿持蒙知遇不可與衆浮沉苟且自愛事有不可必諉

之上察物太精躬臨庶政失其大體動與公違姦諛從而間之屢至不悅親友或規之公曰吾上不負天子下不負吾所學不恤其他公精於吏事斟酌剖決不爽錙銖其經綸制度具在德宗實錄及實叅納劉士寧之賂爲李異所發得罪左遷橫議者以公與叅素不協歸罷相之議於公戶部侍郎判度支裴延齡以姦回得幸害時蠹政物議莫敢指言公獨以身當之屢言不可翰林學士吳通玄忌公先達每竊中傷陰結延齡互言公短宰相趙憬公之引拔升爲同列

陸軍公奏議
以公排邪守正心復異之羣邪沮謀直道不勝十年
退公爲賓客罷政事明年夏旱芻糧不給軍校訴於
上延齡奏曰此皆陸贄輩怨望鼓扇軍人也貶公忠
州別駕上怒不可測賴陽城張萬福救之獲免蜀帥
韋令抗表請以贄代已歲賂資糧公在南賓閉門却
掃郡人稀識其面復避謫不著書惟考校醫方撰集
驗方五十卷行於世江峽十稔永貞初與鄭餘慶陽
城同徵還公已薨歿時年五十二公之秉筆內署也
摧古揚今雄文藻思敷之爲文誥伸之爲典謨俾獯
狡向風懦夫增氣則有制誥集一十卷覽公之作則

知公之爲文也潤色之餘論思獻納軍國利害巨細
必陳則有奏草七卷覽公之奏則知公之爲臣也其
在相位也推賢與能舉直錯枉將幹璿衡而揭日月
清氛泯而平泰階敷其道也與伊說爭衡考其文也
與典謨接軫則有中書奏議七卷覽公之奏議則知
公之事君也古人以士之遇也其要有四焉才位時
命也仲尼有才而無位其道不行賈生有時而無命
終於一慟惟公才不謂不長位不謂不達逢時而不
盡其道非命歟裴氏之子焉能使公不遇哉說者又
以房魏姚宋逢時遇主克致清平陸君亦獲幸時君

而不能與房魏爭列蓋道未至也應之曰道雖在我
弘之在人蜚蝗竟天農稷不能善稼秀草覆轍丘軻
亦廢規行若使四君與公易時而相則一否一臧未
可知也而致君不及貞觀開元者蓋時不幸也豈公
不幸哉以爲其道未至不亦誣乎公之文集有詩文
賦集表狀爲別集十五卷其關於時政昭昭然與金
石不朽者惟制誥奏議乎雖已流行多謬編次今以
類相從冠于編首兼略書其官氏景行以爲序引俾
後之君子覽公制作效之爲文爲臣事君之道不任
僥歟

宋朝名臣進奏議劄子

元祐八年五月七日蘇軾同呂希哲吳安詩豐稷趙
彥若范祖禹顧臨劄子奏臣等猥以空疎備員講讀
恭惟

聖明天縱學問日新臣等才有限而道無窮心欲言
而口不逮以此自愧莫知所爲竊謂人臣之納忠譬
如醫者之用藥藥雖進於醫手方多傳於古人若已
經效於世間不必皆從於已出伏見唐宰相陸贄才
本王佐學爲帝師論深切於事情言不離於道德智
如子房而文則過辯如賈誼而術不疎上以格君心

之非下以通天下之志但其不幸仕不遇時德宗以苛刻爲能而贊諫之以忠厚德宗以猜疑爲術而贊勸之以推誠德宗好用兵而贊以消兵爲先德宗好聚財而贊以散財爲急至於用人聽言之法治邊馭將之方罪已以收人心改過以應天道去小人以除民患惜名器以待有功如此之流未易悉數可謂進吾口之藥石鍼害身之膏肓使德宗盡用其言則貞觀可得而復臣等每退自西閣卽私相告言以陛下聖明必喜贊議論但使聖賢之相契卽如臣主之同時昔馮唐論頗牧之賢則漢文爲之大息魏相

條晁董之對則孝宣以致中興若

陛下能自得師莫若近取諸贊夫六經三史諸子百家非無可觀皆足爲治但聖言幽遠末學支離譬如山海之崇深難以一二而推擇如贊之論開卷了然聚古今之精英實治亂之龜鑑臣等欲取其奏議稍加校正繕寫進呈願

陛下置之坐隅如見贊面反覆熟讀如聽贊言必能發

聖性之高明成治功於歲月臣等不勝區區之意取進止

淳熙講筵劄子

勅送到太中大夫試刑部尚書兼侍讀兼吏部尚書
蕭燧中奉大夫權兵部尚書兼侍讀宇文价通議大
夫給事中兼侍讀兼太子詹事葛邲朝議大夫試右
諫議大夫兼侍講蔣繼周通奉大夫充敷文閣侍制
提舉佑神觀兼侍講同脩國史洪邁朝散大夫起居
郎兼國史院編修官兼權直學士院李巘朝散郎守
起居舍人吳煥劄子奏臣等恭觀淳熙八年夏四月
甲戌經筵進讀

眞宗皇帝陛下正說終篇六月壬申有

旨宣諭陸贄奏議可與不可進讀侍讀臣希呂等言
贄論諫數十百篇皆本仁義元祐中蘇軾等乞繕寫
進呈置之坐右將來開講如令進讀實有補於治道
七月丙子
制曰可且今日講五版九年四月辛亥
詔講讀官同班奏事

聖語云朕每見贄論德宗事未嘗不寒心正恐未免
有德宗之失卿等可各條具闕失來上侍讀臣輝奏
言

陛下推誠待下可謂曲盡其至待講臣洽言德宗
忌刻薄唐書一贊盡之矣

聖語云德宗強明不肯推誠待下雖更奉天離亂終
不悔悟當彼艱難之時所宜與贄朝夕論議猶恐不
濟而每事但遣左右宣旨罕嘗面諭豈能深究利害
此所以知德宗之不振也侍講臣敦詩言德宗於軍
旅間亦多是中人傳旨實情安得上達

聖語云德宗欲以此濟其猜忌刻薄輝又奏
聖言及此社稷之福於是合辭奏言臣等敢不仰遵
聖訓願竭愚衷十三年三月癸卯開講時奏議猶有
三帙凡二萬五千餘字有

旨諭講讀官令自後每讀以半帙爲率四月庚戌臣
燧等讀贄論度支令折稅市草事狀臣燧等言自古
聚歛之臣務爲欺誕以銜已能未有不先紛更制度
者

聖語云天下本無事庸人擾之耳庚申臣燧讀贄所
論裴延齡書

聖語云陸贄論延齡姦惡反覆曲折如此延齡可謂
至小人臣燧言延齡之姦最甚世所罕有又有

旨特以十八日二十二日

御講筵臣燧又讀贄所論裴延齡書讀畢臣燧言若

子未嘗不欲去小人然爲小人所勝如蕭望之爲恭
顯所勝張九齡爲李林甫所勝裴度爲皇甫鎛所勝
聖語云皇甫鎛亦延齡之徒也惟臣等以庸瑣之才
幸得備員華光日侍左右仰惟

陛下天縱典學緝熙光明一話一言皆足以貽諸萬
世堯舜之聖不過如此豈唐德宗所當同日而語然
宸心惕惕每慮或蹈其失以爲寒心夫德宗親聞贄
言而棄之如土梗

陛下追誦贄語而寶之如元龜至以退朝之後傾聽
數千言而不爲倦厭又特於雙日

躬御邇英蓋故事所未有

聖愚相去何止高天之與下地臣等不勝大願乞
宣付史館以彰著

陛下不矜不伐執古御今之意無任昧死俟
命之至取

進止五月一日三省樞密院同奉

聖旨依奏

進唐陸宣公奏議表

迪功郎紹興府嵯縣主簿臣擘言臣所註唐陸宣公
贄奏議十五卷繕寫成帙謹詣登聞檢院投進者不
負所學期納忠於一時據直而言果爲法於後世可
謂皆本仁義非徒曲盡事情雖殫見聞奚探涯涘臣
誠惶誠懼頓首頓首竊以言有逆順道存是非大臣
知憂國而愛君有懷必吐小人喜乘時而射利流弊
無窮顧忠邪之蹟易明豈聽納之際難辨倘人主用
心或好順而惡逆則羣下進說必以是而爲非此忠
言多致於不行而吾道每憂其難合惟陸贄蘊經濟

之略值德宗當艱難之初勢雖危疑動必剴切無片
言不合於理靡一事或失於機策之熟見之明若燭
然而數計言之重辭之復冀陽長而陰消惜乎納鑿
不侔冰炭難入方其多難姑屈意以聽從逮至小康
遽追仇而擯棄主眷則異臣心益堅第知卹天下之
安危豈復計吾身之利害論諫數百雖晦蝕於建中
正元之間勸講再三迺發揮於元祐淳熙之盛幸聖
賢之默契宜今古之同符恭惟
至尊壽皇聖帝性本誠明學全終始既多識於前言
往行道積厥躬猶不遺於片善寸長近取諸贄折衷

一語鼓動四方斯蓋恭遇

皇帝陛下法乾行健繼離嚮明治已至不忘於兢業
德雖盛猶樂於討論粵自潛藩屢披奏牘惟精惟一
固得於問安視膳之餘嘉謀嘉猷復取於攷古驗今
之次臣自慙魯鈍有愧師承妄加採摭之工僭釋精
英之論庶期觀覽易究端倪畫蛇寧免於支離坐井
曷窺於小大徒傾口耳何補涓埃伏望

皇帝陛下置坐之隅以古為鑑廓日月之明斷制庶
政恢江海之量容納眾言鑿瓜果離賞不妄加念兵
食而將不輕用斯皆治道之急務固亦聖主所優為

使毫釐有濟於斯民則竹帛愈光於前哲其奏議并
目錄共十一冊謹隨表上進以

聞臣冒犯天威下情無任激切屏營之至臣誠惶誠
懼頓首頓首謹言

紹興二年八月初七日進呈

陸宣公奏議敘

皇明衛府左長史奉議大夫三衢金寔誤

唐有天下三百年相業之盛惟貞觀稱房杜開元

稱姚宋豈其他爲相者之賢皆不及四人哉蓋君

臣知遇之爲難也夫四人者之於其君信之篤而

任之專故讒諛不能間而忠讜得以行所以一德

協和庶事用康以弼成隆化而他人莫能及非賢

才不常有也時不常有也予於陸宣公之出處未

嘗不爲之扼腕焉公以天縱之忠濟之以弘博之

學當德宗奉天之難間關扈從掌制代言忠誠劄

切足以感奮義師消彌逆節俾唐之宗社幾墊而復植翊戴贊襄之功所居多矣秉政未幾隨罹謫黷一斥不復以至於死使天下之人不復見貞觀開元之盛果公之忠賢視四人者大相遠乎然以時視之則相遠矣蓋公之不能者命也公之不亡者天也是故忠言讜論可與日月爭光遺像廟食可與天地同久又豈他人之所能及哉公本吳人攜李舊有祠堂歲久就圯大理卿廬陵胡公元節方以節鎮淪東西諸郡既作新之而文集奏議故版漫滅復命翻刊以惠後學書成俾予識其端矣

以大理公之長材碩望景行仰止儷美先哲固不爲難况

重熙累洽之辰

明良一心無少間隙則視公所遭之時異日語也行將致

君堯舜而自期伊臯若貞觀開元之四人者殆不足取法也因承命敘公之文致深願焉

宣德三年龍集戊申九月望日

陸宣公奏議敘

明賜進士中憲大夫廣東等處提刑按察司副使同
郡項忠蓋臣謨

文章之作以理爲主氣爲助辭爲尚夫以理爲主
則推本仁義而不流於虛誕氣爲助則嚴毅剛正
而不至於委靡理氣旣備而無辭以粉飾之何以
重當世而示後學哉古今文章體制不一三代以
上渾渾噩噩不可尚矣三代以下若漢之董賈唐
之韓柳宋之歐蘇皆有文章鳴於世至如奏疏獨
稱唐之嘉禾陸宣公歷千餘載盛行而不泯者何

哉蓋宣公當德宗變輿播遷之日從符奉天隨事
納忠盡情論列故其奏疏炳若丹青至於論輕重
之權破反道之說明天命人事之義辨治亂得失
之由陳備邊之六失節財賦之六條求其要必欲
引君於當道也以至制冊詔誥何啻數十皆辭嚴
義正動中事機得非辭理兼備而以氣爲助者豈
宜乎愈久而愈不泯也先正謂立言而朽君子不
爲蓋有由爾公之奏疏制冊詔誥舊有板刻蓋
書院年久剝落之甚雖印流四方觀者病其訛不
嘆其軼之不全近有順天延公祥以練達之才不
清之操用輿論

廷薦知守是邦迺於下車之初首訪民瘼崇尚文雅
政務之暇訪求奏疏善本嚴加考證訛者斥之闕
者補之遂與同寅同府侯公康遠通府鄧公鏞
公礪推府莫公暹各捐已俸重繡諸梓命公之胤
陸頡收掌以永其傳屬予敘弁諸首予疎陋寡昧
無窮理之學閱博之見何敢以敘然以郡守表章
賢哲盛心不可不白義難以辭竊惟有一代之君
必有一代之臣君非臣無以成其治功臣非君無
以顯其事業必有君有臣然後得以相須也嗟夫

自古有賢明之君而不遇忠良之臣者固多間有忠良之臣而不遇其君者亦有矣若宣公之輔德宗不以其君不足與爲善而能盡事之之義誠爲人臣之表式如觀奏疏可驗矣或者謂唐之賢相獨稱房杜姚宋而公不預何在蓋房杜當太宗開創之初委任不疑故得展其底蘊以成貞觀之治姚宋適玄宗勵精之始禮貌大臣故能弘納諫諍以成開元之功至若德宗之專欲猜忌用舍乖張如延齡以欺罔而寵擢公輔以直諫而左遷李齊運以柔佞爲常伯韋渠牟以辯給爲補遺雖陸公論諫之多十無一納殆孟子所謂一薛居州其如宋王何者與若俾陸公遭遇太宗玄宗之君則房杜姚宋不足爲也故品論人物尚夷其行原其心考其時何如焉耳何什一遂廢千百哉予非能文姑述公之文章相業之盛君臣相遇之難以塞來屬若公之出處始末之詳備載史冊其歷代暨聖朝崇尚之美則有先正之敘記碑誌可考茲不復贅言

天順元年龍集丁丑魏九月初吉

陸宣公制冊奏議集敘

明賜進士及第翰林

國史脩撰儒林郎華亭錢福謨

唐陸宣公之文權德輿敘之甚詳而其奏議宋蘇軾所進劄子評之甚當因論其世宋儒雖有成說福則敢謂自漢以來惟諸葛武侯一人作配而已公之後未論也蓋武侯躬耕南陽不求聞達若泊然無意於世者及感昭烈三顧之勤則立談之頃天下大勢舉在目中英雄角立卒莫能逃其妙算公以少年文學感德宗之知遇奉天草詔動中事

機內署獻納纖悉畢具遂使跋扈革心奸諛側目
慨然以天下爲已任者及遭讒南竄則閉門惟著
方書數十卷又若退然無與於當世之務者然是
其用行舍藏孰得而上下之哉且臥龍之望已重
於草廬之下而簿尉之調僅拔乎書判之科然提
全蜀之衆不能誅奸雄於大義倡明之日而操數
寸之管乃克討叛逆於乘輿播遷之餘顧剛明信
任之至吳魏挾一代之雄萬策撓之而不足精察
猜忌之萌裴竇任匹夫之術一言間之而有餘故
知山谿之豺虎易禦而城社之狐鼠難防逆順之

大分易明而邪正之並進難別是以漢帝苦吃於
勅敵唐宗自壞於腹心卒之營中之星旣隕永貞
之詔不起皆天也非人所能爲也惟鞠躬盡瘁死
而後已之言與上不負天子下不負所學之論至
於今皎然與白日爭光是則福之所以亮二公之
心者餘豈得而盡知哉至於立言之士惟知就事
論事行之當時而有功垂之後代而無弊如是而
已足以立天下萬世之常規則謂之經足以合天
下萬世所共由則謂之道夫豈道自道事自事議
自議經自經哉他若魏相條晁董之對而載上公

之奏自是臣子事君之妙術漢文帝思頗牧而卒得之魏尚宋仁宗相韓富而尤賢於夢卜又爲帝王師古之卓見於彼先賢曷有損益而世乃以當代之不用爲惜以後人之見知爲幸甚或假時命以致怨尤焉者徒知涕泣之策殞生於賦鵬覆醅之玄俟知於掘地而不知聖人之言曰求仁而得仁又何怨不患人之莫已知求爲可知是又福之所以亮公之心者也公爲嘉興華亭人福爲鄉後進少讀其文慕其爲人每憶朱晦菴稱子游列於文學謂吳人得聖道之英華而多文士乃敢謂自

漢以來吳中文士惟宣公一人而已公之後未論也故雖濫竊文科論事未獲試於機會語道不敢托諸空言而終身景行之志則莫之敢或替焉者適萊陽于君世和以刑部郎中來守嘉興三年鉅細張明上下熙洽稽邦文獻重梓是集屬記歲月以著公之文又一行也觸會初心論列鄙見以就正有道焉方今

聖天子在上崇良黜邪求言如渴正軾所謂必喜贊議論者而方雖傳於古人才不假於異代則經筵講幄當熟陳是集制草章奏亦豈少若人哉福誠

輿尸之凶無幾矣而顧能滅戮狂臣收奠諸藩周旋其間足知其達誠知化也以公之才鋪陳帝矩發揚皇藻夫何遠耳而唐運不隆又見遇伏未至光大亦足悲傷矣按宋軾奏議劄稱其過於子房買誼若乃堅持大節獨立不懼又軾所未發上下今昔未有其匹也方之典謨訓誥未能相越誠白管之玄標青瑣之雅躅也藏之館匱庶幾垂不毀矣蓋公盛美非無青雲之士之表之也咸居於鄉豈能無宣贊復濫諫省每多惕心摘草也公前既具列無勝休嗣之恥漫復敘其所云

嘉靖丁酉夏五月朔刻於鳳池里西清書舍

明賜進士第中順大夫知廬州府事葉運春撰
余不自分其不敏竊竊然有志於當世之務故者
一據古策士之論而於一切浮談無當於用者即
入玄奧具悉置之勿取自漢而下最推穀晁董
生之策本經術晁錯明世務然董則其論獨有迂
遠不切於事情晁則過激而寡恩若宣公奏議可
謂兼之矣其論達國體切民隱中事情言言靡不
當於施施而皆本之六經孔孟之要旨故余嘗謂
宣公之學不徒有見錯之名實而

真純丁酉夏氏月晦修敘鳳州里西齋書舍

陸宣公奏議敘

明賜進士第中順大夫知廬州府事葉逢春撰

余不自分其不敏竊竊然有志於當世之務故嗜

採古策士之論而於一切浮談無當於用者卽妙

入玄奧具悉置之勿取自漢而下最推轂晁董董

生之策本經術晁錯明世務然董則其論間有迂

遠不切於事情晁則過激而寡恩若宣公奏議可

謂兼之矣其論達國體切民隱中事情言言靡不

當於注施而皆本之六經孔孟之要旨故余嘗謂

宣公有董子之經術不失之迂有晁錯之名實而

不淪於刻舉此而措之何難於理後世子瞻有味之而以子房賈生論焉亦爲未盡知公者也頃時弊祖玄談鄙言名法家爲俗以故翰墨流梓書盈棟充宇非莊生之汪洋自恣則禪之虛空無着也至如經濟之書若此者獨缺焉是猶舍五穀而索瓊田之粟以療饑棄井泉而冀瑤池之漿以止渴余甚惑矣而慨然有是書之梓非直以經世之用蓋竊欲以挽世之流令讀是書曉然平治之道若取諸掌不以彼而易此也是爲敘

萬曆九年辛巳穉七月既望

讀宣公奏議說

唐世賢相善謀善斷尚通尚法尚直尚文功業素表非無可稱然皆出于才質之美而未嘗根于學問殆不免乎朱子所謂村宰相者獨魏鄭公耻其君不爲堯舜進諫論事每以仁義爲勸頗爲知學夫何建成之事君子病焉吾所敬服者惟陸宣公乎論諫數百炳若丹青雖當擾攘之際說其君未嘗用數今觀奏議一書若罪已改過之言用人聽言之方以及備邊馭將財用稅法纖悉畢舉其學之純粹蓋三百年間一人而已德宗僅能聽其一二尚能削平朱泚恢復

陸宣公集後敘
舊物使盡行其所學貞觀之治尚足言哉嗚呼有王
佐之臣而知之不用用之不終於公固無所損益然
唐之天下則可悲矣

唐陸宣公集後敘

士君子稟昆侖磅礴之氣性資明敏蘊之爲忠悃
發之爲文章有關於世教者其唐相陸宣公歟公
明聖賢之學抱經濟之才際遇德宗累官拜相左
右贊翼開心見誠論切事情而不迂言本道德而
有據酌古今之通義爲政治之準繩制誥奏議凡
二十二卷其間經綸制度典章文物靡所不具其
辭嚴其義正誠可接軫典謨焉王佐之才與伊傅
爭衡傑出漢廷賈董之右也志士仁人誦其書莫
不景慕興起余叨承

聖朝寵命拜官知禾郡事每適郡庠觀宣公是編自
元至大間郡守王公子中重刊以永其傳歷經歲
遠編簡蠹朽而不全全者字畫模糊而不可讀遂
與同寅貳守鄴邑武公全借教授泗濱楊公旭相
為補缺與廢之舉迺求善本倣刊復新俾人人獲
閱全書由是宣公之文益明而益著耿耿然與金
石同不朽矣有官君子詳觀編覽則有以見公之
長才遠識藹然堯舜君民之心也為臣倣忠能法
於茲顧不美歟

大明永樂十四年浙江嘉興府知府淮陽齊政謹書

重梓宣公奏議跋

凡歷代名臣奏議傳之者夥矣大抵或隨時或
就事要皆出於才智之運籌而未必根於學力
之貫徹所以隨處散見與時俱泯焉耳惟我

宣公當唐德宗乘輿播遷之際紆籌策於艱虞敷
悃誠於否隔唐之社稷幾傾而復延者皆本於
公之學問淵源動墨而橫鋪經濟弘詞敏達揮筆
而傾否持危是以績奏當時典章傳萬世而不
朽德垂後裔精神貫百代而流通先大夫莊簡
公亦用之以敷歷

陸宣公奏議 卷之六
三朝區大計決大疑者屢矣是所謂家之箕裘
國之著蔡者非耶方今

聖天子建極綏猷

諸明公同寅修輔而中外翕然熙洽矣然愚之開
誠誠布公尤有望治無窮之心是用舊板校正重
梓廣傳庶或有補于百官之承式而仰有裨于
萬幾之鴻休也詎直揚先世之懿範爲一家之燕翼
而已哉 峕

萬曆丙午孟春望日

宣公三十七世孫刑部員外郎岑忠謹跋

重刻陸宣公奏議跋

夫六籍而下文豈勝談哉顧在漢獨稱董賈豈以
天人三策皆本經術而治安數千言通達國體有
三代之遺意焉斯固敷對之嚆矢而忠蓋之警箴
也唐之盛時房杜姚宋赫然稱首其文詞迺不少
概見而陸敬輿氏乃今以奏議特聞豈施設者在
功業故其文不彰議論者在文章故其遇難合議
者必以成敗較之不然耳昔人謂唐書不可不讀
蓋事變莫多於唐士者學以應世亦取近世已行
之蹟參稽其成敗而斟酌其議論舉而措之可也

然唐之多故莫難於奉天之時而倉卒應變議
論周悉莫具於陸敬輿之奏議蘇子瞻進之宮庭
以資講讀夫人主猶爾况韋布乎姚江葉公嘉惠
來學謂邇來習論道者祖玄虛而經世者尚權術
非莊老之玄幻卽管商之刻覈卮言無當主文太
峻二者無取焉欲其根本六籍若董之馴經濟時
務若賈之達舍敬輿之奏議將何則焉噫嘻蘇子
瞻文雄一代繼韓歐而接其芳躅姚江公傑然主
盟蓋登壇而執牛耳者也顧二公所推轂者惟此
則文章所重固自有在而二公之所爲文亦可槩
見矣某公方弘臯夔之謨以贊

略而獨用心及此蓋謂文章之於世道所繫非小
行將挽衰薄爲渾厚駸駸乎大雅矣幹旋之力豈
不以人哉

萬曆九年辛巳冬十月知六安州事溫陵李懋檜撰

(1581)

陸宣公奏議跋

六安佐吏郢西劉垓著

今譚經史之書者大都推陸宣公奏議云履其梓
堙訛不可讀姚江葉公守廬陽文章經濟乎公久
矣乃訂正重梓之以詔來者而下吏垓亦幸役在
校讐夫公之大者葉公及諸君子識之矣余復何
贅余獨于公之心有感焉蓋其奏議奚下千萬餘
言總之以不負君與學爲心卽是兩不負之真心
徒以奏議誇天下來世而不見之實用哉何竟爾
爾也嗟嗟天地正直之氣未嘗不種于忠臣義士

而又不欲盡洩其用故用而不用必使其光史册
垂奕世而因取藉于無窮此固天所以厚忠臣義
士而實非盛世所宜有也臯夔而上亡論已卽唐
盛時前房杜後姚宋非無諫諍于當時要之言聽
功著而人見其功不聞其議何者其開創炳烈中
興翊運于君子學兩無負矣宣公當德宗播遷之
時始不得已而有疏迨德宗易聽于衆咻而不使
所學之究所用始不得已而有疏名夫不能齊名
四臣使天下復覩貞觀開元之盛而僅以奏議聞
宣公意哉故曰天也天之所以厚公者固自

在而公則無樂乎其有此也其不知者謂公之
不能有加于四臣之功其知者謂公不難于四臣
之功而四臣則未必能爲公之疏是皆未深知公
者公之心曰與而朝上一牘夕上一牘而空言之
無補也孰若爲四臣者朝行令而民夕受其福夕
希令而民朝受其福也彼空言無補而于君子學
終有負也此非宣公意乎今

君聖相良一德同心在事諸臣豈無忠愷如公者幸
當諫行言聽故各以功顯不以諫名葉公明時之
臯夔而以功顯又何論四臣茲于公之奏議梓之

若曰倘

主上顧問臣臣將執此以獻且臣不願有公之奏議願有公兩不負之真心臣玆敬聞命矣敢不奉以

周旋

萬曆九年十月吉

唐陸宣公奏議目錄

卷第一

制誥

奉天改元大赦制

平朱泚後車駕還京大赦制

卷第二

制誥

貞元改元大赦制

冬至大禮大赦制

卷第三

制誥

貞元九年冬至大禮大赦制

蝗蟲避正殿降免囚徒德音

誅李懷光後原宥河中將吏并招諭淮西詔

誅李希烈後原宥淮西將吏并授陳仙奇節

度詔

重宥淮西將士詔

卷第四

制誥

賑卹諸道將吏百姓等詔

優卹畿內百姓并除十縣令詔

重優復興元府及洋鳳等州百姓詔

議減鹽價詔

賜京城及同華等州百姓種子賑給貧人詔

賜將士名奉天定難功臣詔

改梁州爲興元府升洋州爲望州詔

卷第五

制誥

奉天遣使宣慰諸道詔

收復京師遣使宣慰將吏百姓詔

平淮西後宴賞諸軍將士放歸本道詔

加王武俊李抱真官封并招諭朱滔詔

招諭淮西將吏詔

招諭河中詔

安撫淮西歸順將士百姓勅

甄獎陷賊守節官詔

令百寮議大禮期日詔

不許諸軍侵擾勅

放淮生口歸本貫勅

令諸道募靈武鎮守人詔

卷第六

制誥

冊淑妃王氏為皇后文

冊嘉誠公主文

冊蜀王妃文

冊杞王妃文

告謝昊天上帝冊文

告謝玄宗廟文

告謝肅宗廟文

告謝代宗廟文

祭大禹廟文

制策問賢良方正能直言極諫科

制策問博通墳典達於教化科

制策問識洞韜略堪任將帥科

答宰臣請停大禮表

答百寮請停大禮表

答第二表

答第三表

答百寮賀利州連理木表

答宰臣請復御膳表

答百寮請復御膳表

卷第七

制誥

李晟司徒兼中書令制

蕭復劉從一姜公輔平章事制

張延賞中書侍郎平章事制

渾瑊侍中制

盧翰劉從一門下中書侍郎平章事制

劉滋崔造齊映平章事制

李納檢校右僕射平章事制

韓滉檢校左僕射平章事制

李勉太子師制

姜公輔左庶子制

崔造右庶子制

盧翰太子賓客制

卷第八

制誥

賈耽東都留守制

崔縱東都留守制

普王荆襄江西等道兵馬都元帥制

馬燧渾瑊副元帥招討河中制

李晟鳳翔隴西節度兼涇原副元帥制

劉洽檢校司空充諸道兵馬都統制

卷第九

制誥

渾瑊京畿金商節度使制

杜亞淮南節度使制

虔王申光隨蔡等州節度使制

唐朝臣振武節度使論惟明廊坊觀察使制

韓滉加檢校右僕射制

嘉王橫海軍節度使制

馬燧李臯賜寶封制

韓滉度支鹽鐵轉運等制

李叔明右僕射制

李澄贈司空制

除鄧州歸順官制

李納檢校司空制

卷第十

制誥

賜李納王武俊等鐵券文

賜安西管內黃姓燾官鐵券文

慰問四鎮北庭將吏勅書

與回紇可汗書

賜吐蕃將書

賜吐蕃宰相尚結贊書二

卷第十一

奏草

論兩河及淮西利害狀

論關中事宜狀

卷第十二

奏草

論敘遷幸之由狀

奉天論奏當今所切務狀

奉天論前答奏未施行狀

卷第十三

奏草

奉天請數對羣臣兼許令論事狀

奉天論尊號加字狀

重論尊號狀

奉天論赦書事條狀

卷第十四

奏草

奉天論擬與翰林學士改轉狀

奉天請罷瓊林大盈二庫狀

奉天論解蕭復狀

奉天薦袁高等狀

奉天論李晟所管兵馬狀

奉天奏李建徽揚惠元兩節度兵馬狀

駕幸梁州論進獻瓜果人擬官狀

又論進瓜果人擬官狀

卷第十五

奏草

興元論解姜公輔狀

又答論姜公輔狀

興元論請優獎曲環所領將士狀

興元論解蕭復狀

又答論蕭復狀

興元論續從賊中赴行在官等狀

卷第十六

奏草

興元賀吐蕃尚結贊抽軍迴歸狀

興元奏請許渾城李晟等諸軍兵馬自取機

便狀

興元請撫循李楚琳狀

興元論中官及朝官賜名定難功臣狀

興元論賜渾瑊詔書為取散失內人等議狀

鑾駕將還宮闕論發日狀

請釋趙貴先罪狀

論替換李楚琳狀

收河中後請罷兵狀

卷第十七

中書奏議

請許臺省長官舉薦屬吏狀

請遣使臣宣撫諸道遭水州縣狀

論淮西管內水損處請同諸道遣宣慰使狀

謝密旨因論所宣事狀

卷第十八

中書奏議

論嶺南請於安南置市舶申使狀

論宣令除裴延齡度支使狀

論齊暎齊抗官狀

請減京東水運收腳價於汭邊州鎮儲蓄軍

糧事宜狀

卷第十九

中書奏議

論汭邊守備事宜狀

商量處置竇叅事體狀

奏議竇叅等官狀

請不簿錄竇叅莊宅狀

卷第二十

中書奏議

請還田緒所寄撰碑文馬絹狀

請依京兆所請折納事狀

議汴州逐劉士寧事狀

請不與李萬榮汴州節度使狀

論度支令京兆府折稅市草事狀

論左降官准赦合量移事三狀

論邊城貯備米粟等狀

卷第二十一

中書奏議

論裴延齡姦蠹事一首

論朝官闕員及刺史等改轉淪序狀

卷第二十二

中書奏議

均節賦稅恤百姓六條

其一論兩稅之弊須有釐革

其二請兩稅以布帛為額不計錢數

其三論長吏以增戶加稅闢田為課績

其四論稅期限迫促

其五請以稅茶錢置義倉以備水旱

陸宣公奏疏
小子獲纘鴻業懼德不嗣罔敢怠荒然以長于深宮之中暗于經國之務積習易溺居安忘危不知稼穡之艱難不察征戍之勞苦澤靡下究情不上通事既壅隔人懷疑阻猶昧省已遂用興戎徵師四方轉餉千里賦車籍馬遠近騷然行齋居送衆庶勞止或一日屢交鋒刃或連年不解甲冑祀奠之主室家靡依生死流離怨氣凝結力役不息田萊多荒暴命峻於誅求疲吐空於杼軸轉死溝壑離去鄉閭邑里丘墟人烟斷絕天譴於上而朕不悟人怨於下而朕不知馴致亂階變興都邑賊臣乘釁肆逆滔天曾莫愧畏

敢行凌逼萬品失序九廟震驚上辱於祖宗下負於黎庶痛心覩貌罪實在予永言愧悼若墜深谷賴天地降祐神人叶謀將相竭誠爪牙宣力屏逐大盜張皇維將弘永圖必布新令朕晨興夕惕惟念前非乃者公卿百寮累抗章疏猥以徽號加于朕躬固辭不獲俯遂輿議昨因內省良用矍然體陰陽不測之謂神與天地合德之謂聖顧惟淺昧非所宜當文者所以化成武者所以定亂今化之不被亂是用興豈可更徇羣情苟膺虛美重余不德祇益懷慙自今以後中外所上書奏不得更稱聖神文武之號夫人情

不常繫于時化天道既隱亂獄滋豐朕既不能弘德
 導人又不能一法齊眾苟設密網以羅非辜為之父
 母實增愧悼今上元統曆獻歲發生宜革紀年之號
 式敷在宥之澤與人更始以答天休可大天下改
 建中五年為興元元年自正月一日昧爽以前大辟
 罪已下罪無輕重咸赦除之李希烈田悅王武俊李
 納等有以忠勞任膺將相有以勲舊繼守藩維朕撫
 馭垂方信誠靡著致令疑懼不自保安兵興累年海
 內騷擾皆由上失其道下罹其災朕實不君人則何
 罪屈已弘物予何愛焉庶懷引慝之誠以洽好生之

德其李希烈田悅王武俊李納及所管將士官吏等
 一切並與洗滌各復爵位待之如初仍即遣使分道
 宣諭朱滔雖與賊泚連坐路遠未必同謀朕方推以
 至誠務欲弘貸如能效順亦與惟新其河南北諸軍
 兵馬並宜各於本道自固封疆勿相侵軼朱泚大為
 不道棄義蔑恩反易天常盜竊名器暴犯陵寢所不
 忍言獲罪祖宗朕不敢赦其應被朱泚脅從將士官
 吏百姓及諸色人等有遭其扇誘有迫以兇威苟能
 自新理可矜宥但官軍未到京城以前能去逆效順
 及散歸本道者並從赦例原免一切不問天下左降

官卽與量移近處已量移者更與量移流人配隸及
藩鎮効一作力拜緣罪犯與諸使驅使官兼別勅諸
州縣安置及得罪人家口未得歸者一切放還應先
有痕累禁錮及反逆緣坐承前恩赦所不該者並宜
洗雪亡官失爵放歸勿齒者量加收斂人之行業或
未必兼構大厦者方集於羣材建奇功者不限於常
檢苟在適用則無棄人況黜免之人沉鬱既久朝過
夕改仁何遠哉流移降黜亡官失爵配隸人等有材
能著聞者特加錄用勿拘常例諸軍使諸道赴奉天
及進收京城將士等或百戰摧敵或萬里勤王扞國

全城驅除大寇濟危難者其節著復社稷者其業
我圖爾功特加彝典錫名疇賦永永無窮宜並賜名
旌天定難功臣身有過犯遞減罪三等子孫有過犯
遞減罪二等富戶應有差科使役一切蠲免其功臣
已後雖衰老疾患不任軍旅當分糧賜並宜今給身
死之後十年內仍回給家口其有食實封者子孫相
繼代代無絕其餘敘錄及功賞條件待收京日並准
去年十月十七日十一月十四日勅處分諸道諸軍
將士等久勤扞禦累著功勳方鎮克寧惟爾之力其
應在行營者並超三資與官仍賜勳五轉不離鎮者

依資與官賜勳三轉其累加勳爵仍許回授周親內
外文武官三品以上賜爵一級四品以上各加一階
仍並賜勳兩轉見危致命先哲攸貴掩骼埋胔禮典
所先雖效用而或殊在惻隱而何間諸道將士有死
王事者各委所在州縣給迺送歸本管官爲葬祭其
有因戰陣殺戮及擒獲伏辜暴骨原野者亦委所在
逐近便收葬應緣流貶及犯罪未葬者並許其家各
據本官品以禮收葬自頃軍旅所給賦役繁興吏因
爲姦人不堪命咨嗟怨嘆道路無聊汙可小康與之
休息其墊陌及稅間架竹木茶漆摧鐵等諸色名目

宜停罷京畿之內屬此寇戎攻劫焚燒靡有寧寧
仰給人以重勞特宜減放今年夏稅之半朕以
旻旻犯闕遽用于征爰度近郊息駕茲邑軍儲克辦
旅攸寧式當褰旌以志吾過其奉天宜升爲赤縣
百姓並給復五年尚德者教化之所先求賢者邦家
之大本永言茲道夢想勞懷而澆薄之風趨競不息
幽棲之士寂寞無聞蓋誠所未孚故求之未至天下
有隱居行義才德高遠晦跡丘園不求聞達者委所
在長吏具姓名聞奏當備禮邀致諸色人中有賢良
方正能直言極諫及博通墳典達於教化并洞識韜

鈐堪任將帥者委常叅官及所在長吏聞薦天下孤
 老鰥寡惇獨不能自活者並委州縣長吏量事優恤
 其有年九十已上者刺史縣令就門存問義夫節婦
 孝子順孫旌表門閭終身勿事大兵之後內外耗竭
 貶食省用宜自朕躬當節乘輿之服御絕宮室之華
 飾率已師儉為天下先諸道貢獻自非供宗廟軍國
 之用一切並停應內外官有冗員及百司有不急之
 費委中書門下即商量條件停減聞奏布澤行賞抑
 惟舊章今以餘孽未平帑藏空竭有乖慶賜深愧于
 懷赦書有所未該者委所司類例條件聞奏敢以赦

前事相言告以其罪罪之亡命山澤挾藏軍器百日
 不首復罪如初赦書日行五百里布告遐邇咸使開知
 平朱泚後車駕還京大赦制

門下致理之體先德後刑禮義興行故人知恥格教
 明當則俗致和平然後姦慝不萌暴亂不作古先
 哲后莫不由斯國家受命百七十載八聖儲慶敷祐
 下人邁種寬大之德累蠲苛酷之心蓋仁之所積者
 厚故澤之所流者深茲予小子獲主重器懵於理亂
 之本溺於因習之安授任不明賞罰乖當立法以齊
 衆而犯命愈甚興戎以除害而長亂益繁賊臣蓄姦

乘釁竊發九廟乏祀兆人靡依猘狗肆其吞噬豺狼
 穴於宮闕歲未云半載罹播遷仰慚穹昊俯愧臣庶
 敢愛實越苟全眇躬誠懼益縱寇讐重辱宗社忍耻
 誓志庶補前羞賴億兆宅心不忘先德諸帥戮力恭
 行天罰俾余寡昧再膺多祐總乾綱於既紊復天柱
 於將傾言旋鎬京不改舊物宗祧有序朝享有期責
 重慶多深增感惕嗚呼君者所以撫人也君苟失位
 人將安仰朕既不德致寇與禍使生靈無告受制兇
 威苟全性命急何能擇或虧廢名節或貪冒貨利陷
 於法網事匪一端究其所由自我而致不能撫人以

誠含垢
 布和

道乃欲繩之以刑豈所謂恤人罪已之誠含垢布和
 之義滌清汚俗咸與更新可大赦天下自興元元年
 七月二十三日昧爽已前大辟罪已下已發覺未發
 覺已結正未結正見繫囚徒常赦所不原者咸赦除
 之今年五月二十八日已前左降官即與量移未復
 資者更與移近處流人及犯配隸藩鎮效力並即放
 還亡官失爵放歸不齒者量加收敘未復資者更與
 進改其黜免人等有素著行能傍連譴累特加錄用
 勿以為負不有忠者誰復社稷不有勞者誰從巡狩
 連帥之重所以殿邦禦侮也二千石之任所以分憂

共理也。方鎮將校勤奉戍役，中外察吏恪居官次，國有大慶，所宜同之。內外文武及致仕官三品已上，賜爵一級，四品已上加一階，仍並賜勳兩轉。司徒兼中書令晟、英、特、傑、立、光、輔、中、興，再定皇都一匡天下，推恩之典，貽慶無窮，宜與一子五品正員京官侍中。城沉、遼忠厚服勞王家，保全危城，剪除大憝，嘉乃茂績，次于寵章，宜與一子六品正員京官鎮國軍潼關節度使檢校右僕射駱元光、京畿渭南商州節度使檢校右僕射尚可孤、邠寧等州節度使檢校右僕射韓遊環、奉天行營諸軍節度使檢校右僕射戴休顏、咸

百各與一子

秉大節著于艱難，同勳叶忠翼我興運，宜各與一子七品正員官。諸道節度使及行在都知兵馬使興元扈從左右金吾大將軍金吾六軍大將軍等各與一子八品正員官。諸道團練觀察處置等使各與一子九品正員官。應諸軍赴上都收復將士等俱以純誠奮其勇節，連年帶甲百戰摧鋒，有忘身以效命，有滅親以徇義，誓平國難，如復私讐，競揚貔虎之雄，克清泉鏡之孽，策勲行賞，傳嗣榮親，播乃功名，與國終始。自去年冬已來，未經甄敘者，即與超八資改轉。已經甄敘者，更與超三資進改三品已上祖父母在先無

官封者量與致仕官及邑號亡者並與追贈四品已下父母在先無官封者亦授致仕官及邑號亡者與追贈其賞錢委所司卽依元勅支給應扈從將士三品已上賜爵兩級四品已下各加兩階仍並賜勳其祖父母官封追贈並准收京城將士例處分應扈從官普恩之外三品已上賜爵兩級四品已下各加兩階仍普賜勳三轉其祖父母父母封贈並准收京城例處分應扈從官普恩之外三品已上更加爵一級四品已下更加一階若常叅官祖父母父母在先無官封者量授致仕官及邑號亡者與追贈諸州刺史

普恩外賜爵一級諸道進奏陪位者更加一階其奉天定難及元從功臣宜令本軍本使卽定名聞奏所司各准元勅優賞其諸道軍鎮及行營將士三品已上賜爵一級四品已上加一階仍准今年正月一日制速與甄敘成德淄青魏博等節度并諸軍應歸順將士等各蘊誠義積著功勞由朕失於撫綏頃歲暫懷疑阻尋能勵節不替舊恩是資宴犒俾洽王澤宜委所司卽約額支計各賜錢物賞設仍委本節度准前後勅速條疏甄敘其朔方并諸軍應在河中管內及同州將士等自遠赴難解其重圍念茲功勞並未

酬報雖遭脅制情有可矜應到行營未經甄敘者並准元勅超五資改轉其賞錢比收京城將士例各給一半委本軍兵馬使條錄名銜聞奏所司支計給付其食實封者亦便配額令其請受應天下諸道軍將士等如有年老及疾患羸弱不任軍旅願歸鄉里者並給終身優復州縣切加安存勿令侵擾如無家可歸者給田宅使得存濟身危致命先典所尚況忠衛社稷殺身成功朕於斯人義有加等贈太尉秀實天授貞烈沮茲姦邪倉皇之中獨蘊雄斷將紆國難說收寇其兇謀既虧吾事果濟忠誠奮發手擊渠魁

然振邁千古宜卽差官致祭并旌表門閭府以護其喪事緣葬所要一切官供仍於墓所官爲立碑以揚徽烈其所賜實封五百戶嫡子正員三品官諸子授正員五品官委中書門下卽准元勅處分應諸道諸軍將士有身死王事者委本道本使具名銜聞奏卽與喪贈仍以在身官爵授其子孫內外文武官及諸親諸色人等有橫遭逆賊殺害者各聽其家及親識人於所司陳牒勘實聞奏亦與追贈如跡著忠烈衆所明知仍訪其子孫量加優恤尚齒養老王風之首三代制理未或遺年朕將遵古典以興化本人

心而教孝用優秩賜式慰里閭京兆府者壽年八十
已上並與版授刺史仍賜紫八十已下及諸州府者
壽年八十已上並與版授本縣令仍賜緋天下侍老
者壽亦各與版授官如年九十已上者州縣長吏歲
時躬親省問貧弱不能自存者量賜粟帛頃屬多難
人流俗弊加之以師旅因之以饑饉賦役繁起農桑
失時哀哉癯人汔可小息然以國計猶歎軍實靡克
未盡復除良增愧悼應天下建中四年年終已前所
有諸色逋欠在百姓復內者一切放免百司及諸軍
諸使舉放利錢今年六月已前百姓欠負未納者亦

並停徵京兆府百姓普恩外給復一年其供頓官吏
委京兆尹類例具名銜聞奏量與優獎古者計戶以
署吏因時而建職既不乏事亦無冗員今田畝汗萊
版圖凋耗齊人編戶託庇官曹貪吏猾胥誘爲囊橐
啓奸墮業爲害尤深應在京百司色役人及流外等
委御史大夫卽與諸司使長官審詳商議據見所掌
事之閑劇定額聞奏仍校名送中書門下務從減省
副朕憂人以後應須署置並定名先奏仍永爲常式
今年正月一日赦書節目有所未行者所司並舉而
行之赦書或有不該節此類條件聞奏敢以赦前事

相言告者以其罪罪之亡命山澤挾藏軍器百日不
首復罪如初赦書日行五百里布告遐邇咸使聞知

唐陸宣公制誥卷之二

貞元改元大赦制

門下王者體元立極欽若平天地纂業承統嚴奉于
祖宗用能百神允諧非庶承賴立國之本斯其大經
朕燭理不明違道招損往者多難淪陷國都天地宗
祧曠而莫主則是欽若嚴奉之義缺矣甚用懼焉洎
復京師遽將告謝有司以人力耗數禮物廢墜日居
月諸歲聿云暮卜其吉日俯在上春齊心永懷坐以
待曙而百辟卿士抗疏上言咸謂人心未寧不足以
盡敬寇孽猶在不足以告功迫於羣情俯仰誠願郊

廟孔邇瞻言莫從悼心慚顏胡寧自處重以和平未
洽災沴荐臻去歲旱蝗兩河為甚人流不息師出靡
寧加之以徵求因之以荒饑困窮殍餒轉死丘墟關
輔之間冬無積雪土膏未發宿麥不滋詳思咎徵有
為而致兵戎之後餘稜尚存獄犴之中深寃未釋又
河中淮右逆將阻兵扞脅齊人陷之死地雖欲自雪
厥路無由抱義銜寃足傷和氣此皆由朕爽德播災
于人為之父母實用愧耻今玄陰已謝春日載陽勾
萌畢伸幽蟄咸震思與海內同心自新發號更元用
符天意宜改興元二年為貞元元年自正月一開味

爽已前大辟罪已下已發覺未發覺已結正未結正
繫囚見徒罪無輕重咸赦除之先准勅令量移收敘
人所司據節文速與處分應河中脅從將士多是奉
天赴難功臣本居朔陲夙尚忠節豈以一夫註誤棄
其累代勲庸朕於此軍尤所不忍特宜洗滌以待初
誠自非與官軍決戰死於鋒刃其餘雖臨陣擒獲亦
從釋放棄逆歸順者在身先有官爵實封一切如舊
仍准前後勅所在便給賞錢并與甄敘如有因危效
節建立殊庸量其事績特加獎擢李懷光若能翻然
悔過束身赴朝念其嘗有大勲必當終始全護仍准

前勅授之官封朕於功臣庶亦無負淮西將吏百姓等皆被劫制久爲匪人詢事原情諒非獲已今王師四合計日誅夷玉石俱焚用增惻憫宜令諸道進軍之世唯在首惡一人其餘徒黨悉從原宥如有歸順及立功者並准河中將士例褒獎夫爲國之要在於審官共理分憂守宰彌切闔境性命繫乎其人將使里閭無愁苦之聲風俗興廉讓之教得不慎簡髦彥寄之化源自今已後諸州刺史有關中書門下於朝官中精擇有理人才術者授之如刺史縣令在任頻年課績尤異者擢授侍郎給舍郎中御史中外迭處

用觀其能賞罰必行期於競勸自頃選曹署吏唯以書判求人務騁浮華莫稽實行且能言者不必適用蘊用者或未能言凡爲擇人其在精覈宜令清資常參官每年於吏部選人中各舉所知一人堪任縣令錄事叅軍者所司依資敘注擬便於甲曆之內具標舉主名銜仍牒報御史臺如到任後政尤異者有賊犯事跡著明者所司錄舉官姓名聞奏以爲褒貶其內外員及京城諸使名目委御史審勘會商量并省停減仍集百寮定議務從簡約息費使人其京官職田及息利官錢等黠吏詆欺移易疆畔或貧人轉徙

捕繫親鄰日月滋深耗弊彌甚亦令百寮議其折衷
 擇善而行往以賦役殷繁人不堪命定為兩稅事額
 易從比屬軍興或踰始制法無所守吏益為姦哀我
 勞人汜可小息自諸道州府除兩稅外應有權宜科
 率差使一切悉停京畿及近縣所欠百姓和糴價直
 委度支即勘會支給諸道非臨寇賊州縣自冬已來
 點召官健子弟並宜放散任營生業應經陷賊州縣
 百姓屋宇被焚毀并貧病老弱及遭傷損之類所在
 量加優恤使得安存天下名山大川并自古聖帝明
 王賢臣烈士祠廟墳墓各委當處長吏擇日致祭必

資精潔以達志誠班制有差所以序賢也廩秩有等
 所以明勸也今或高卑失序中外相踰至於卿士之
 俸尚羅東餒之患忠信重祿豈其然耶內外官祿及
 俸錢手力雜給等委中書門下度支即參詳定額聞
 奏應赴奉天及收城將士等並功存社稷節著艱危
 中心藏之豈忘酬報頃緣府藏空竭賞給未周乃眷
 勲臣實用增愧應准元勅合請賞錢人委所司節減
 在官及白司費用據所有財物速與給付應在京城
 及諸道立功將士等先有詔旨並許甄敘所司勘會
 淹歷時月委中書門下即准元勅處分諸軍行營并

河中朝邑被脅從將士家口在京及諸州府者宜令
本道節度觀察使安存賑恤各令優給應諸軍使立
仗見在城將士等其賜七萬匹制書有未該備所司
速皆類條件聞奏敢以赦前事相言告者以其罪罪
之亡命山澤挾藏軍器百日不首復罪如初赦書日
行五百里遐邇咸知

冬至大禮大赦制

門下君天下者受命于天地繼業于祖宗致其誠心
惟敬與孝違敬莫大乎廢祀虧孝莫大乎黷神朕以
眇身屬承大統縱欲敗度浸生厲階兵連禍深變起

都邑六師播蕩九服震驚郊廟園陵陷於凶逆神
乏主將迨周星列聖大業幾墜於地違虧敬孝罪由
朕躬撫臨萬邦甚用自愧側身思咎庶補將來股肱
元臣比義叶德爪牙衆士戮力同心誅大憝而都邑
廓清剪逋寇而關河底定茲再與王公卿尹洎億兆
之人備其盛容修其禮物薦誠清廟展敬園丘陳謝
罪愆告雪憤耻感慕慙惕若無所容上帝顧懷再新
景命豈伊匪德獨荷鴻休思與普天誕膺多福可大
赦天下自貞元元年十一月十一日昧爽已前大辟
已下已發覺未發覺已結正未結正繫囚見徒罪無

輕重常赦不原者咸赦除之左降官量移近處流人及藩鎮效力並卽放還應有痕殿禁錮前後恩赦節文未該及者亦宜洗雪勿以爲累李希烈僭逆不道誠所難容朕憫念蒼生務息征討頻有詔命許其自新若能歸降依前勅待以不死淮西管內將士官吏百姓等一切原有與之如初先有官封亦皆復舊如能特建功效者當別抽擢若家口親屬在諸道者長吏給空閑地任便安居優復終身務令全濟待事平已後總歸本貫天下百姓去年十一月已前欠負官

稅官租及諸色人適懸一物已上但不在官典復內者一切免放內外文武官是任及致仕官三品已上賜爵三級四品已下加一階天下諸使諸將軍士三品已上賜爵一級四品已下加一階白身人賜勳三轉首項兇渠倡亂逆臣附姦保據國都憑陵旬服朕出次郊邑再遷巴梁險阻艱難靡不經歷暴亂之後仍彰烈士之功憂危之中方見直臣之節錄勳進善其可弭忘應奉天興元元年扈從立功并收京城將士食實封者各隨文武與一子官餘並加兩階仍賜勳三轉其文武百官應扈從到興元府者五品已上

賜爵一級六品已下加一階合入三品五品者不拘
 考限聽敎其五品已下父母未經追贈者與追贈應
 平河中將士卽准元勅速與甄獎自建中四年已來
 有身死王事義烈著明未經褒贈者本道卽具名銜
 事跡聞奏諸道有解退官隄州府長吏切務安存仍
 量以空閑田地給付免其差役任自營生社稷之勲
 以輔興王業統帥之任以總制戎麾參袞職者其德
 崇授旄節者其功大方鎮乃國之垣翰禁衛實予之
 爪牙尹京實賴於肅清主計尤資於辦集所頒慶澤
 宜越常倫司徒兼中書令晟宜與一子五品正員官
 拜四品階諸道副元帥與一子六品正員官中書門
 下平章事充節度使各與一子七品正員官節度使
 及神策兵馬使六軍統軍金吾六軍大將軍判度支
 侍郎各與一子八品正員官都團練都防禦等使京
 兆河南尹金吾六軍將軍殿前射生兵馬使各與一
 子九品正員官多難已來三十餘載克平禍亂屬在
 戎臣或節著艱危或勲高戰伐受任雖專於總帥成
 功亦賴於羣材懋賞推恩宜加胤嗣諸道大將功業
 崇高者各與一子官本使卽詳定錄名聞奏副元帥
 都統兼節度下每道各二十人都團練都防禦使下

國朝典章考 卷之二 十一

各十人如大將子孫之中有藝業優長性行純確者本使具狀聞薦仍量事資給令赴上都朕當隨材授官以充侍衛庶使忠臣之後與國無窮故尚父子儀先朝元勳再復京邑贈太尉秀實以死爲國節冠古今宜令與子孫一人五品正員官自至德已後節度使大將有忠烈績效著明其後淪翳者所司卽條錄聞奏與子孫一人正員官諸色人應在賊中潛奉神主項已甄賞宜便賜優崇二品已上賜爵一級四品已下加一階江淮轉運使檢校左僕射同中書門下平章事韓滉勵精勤職夙夜在公漕輓資儲千里相

繼事無憊素人不告勞拯于凶災厥有成績可進封晉國公關畿之內連歲興戎薦屬天災稼穡不稔穀糴翔貴烝黎困窮倉廩空虛莫之賑贍每一興念憫然痛心宜令度支取江西湖南見運到襄州米十五萬石設法般赴上都以救百姓荒饑如山路險阻車乘難通仍召貧人令其般運以米充腳價務於全活流庸庶事優饒副朕勤卹立國之道始於親親所以厚骨肉之恩明教化之本況薦經艱故宗族漂淪敦睦之情有加常典大長公主長公主各與一子七品官嗣王郡王郡王縣王各與一子官出身應倍

位皇親五等已上諸親三等已上者三品已上賜爵
一級四品五品加一階六品已下及常選官散官等
簡選日優與處分未出身人量授文武散官如宗子
中有德行才能宗正卿具名聞奏當別獎任致理之
本在乎審官審官之由資乎選士將務選士之道必
精養士之方魏晉已還澆風未革國庠鄉校唯尚浮
華選部禮闈不稽實行學非為已官必徇人法且非
精弊將安救宜令百寮詳思所宜各修議狀中書門
下參較得失擇善而行有虞建官三載考績在漢為
吏或長子孫蓋吏久於官則人情不苟官久於事則

理化有成日者制度廢墮考課乖舛淹速靡準升降
無名欲令庶寮何以懲勸自今以後刺史縣令未經
三考不得改移自餘非在職績效殊尤亦不得越次
遷轉刺史停替須待魚書內外五品已上及常參官
在任年考已深者即量才效用與改中外迭處以觀
其能夫明日達聰務廣聞見或慮懷才抱器輸忠納
諫之倫地處幽遐無由自達永言於此夢想不怠應
諸色人有長策濟時忠規匡主任具陳所見詣所居
之州委刺史畧與討論觀其旨趣但有裨治道不涉
弘清便與附驛遞送朕當親覽自立兩稅經今百年

或初定之時已有偏併或戶口減耗舊額猶存輕重不均流亡轉甚委度支卽折衷條理以卹困窮古者雖有水旱人無菜色皆由儲蓄不匱勸導有方前代所置義倉國初亦循其制備災救乏其便於人卽宜准貞觀故事天下所墾見田上自王公下及百姓每豐稔之歲秋夏兩時州縣長官以理勸課據頃畝多少隨所種粟豆稻麥隨所貯納以爲義倉如年穀不登卽量取賑給官司但爲其立法勸諭不得收管仍各委本道觀察使隨便宜處置聞奏敦本厚生必資播殖當今所切莫甚於斯自今百姓有墾闢田疇加

於常歲者所加之地不得輒徵租稅刺史令長老議亦以本界墾田多少爲殿最今年蝗旱損甚州府開春之後量給種子使就農功天下應荒閑田有肥沃堪置屯田處委當管節度使觀察都團練都防禦等使刺史審細檢行以諸色人及百姓情愿者使官佃如部署精當收穫數多本道刺史特加褒升屯田等節度優賞如是逃戶田地本主復業卽却給還輦轂之下四方會同供應旣多難爲準定急賦繁役人何以堪宜令京兆尹與度支計會長安萬年兩縣每季各先交貯備錢五千貫文於縣庫收納定清幹官專

知應緣卒須別索及雜供擬并工匠等縣令與專知
官先對給價錢季終之後申度支勘會所是和市和
顧並須先給價錢兩稅外一物已上不得科配百姓
御史臺朝廷紀綱尚書省治化根本百度得失繫乎
其人自頃制勅頒行所司多不遵守王臣奉職豈所
宜然委御史臺左右丞切糾稽違無壅朕命南郊太
清宮太廟應職掌行事官郊廟攝將軍中郎郎將及
留守副留守內定行從官三品已上各賜爵一級四
品已下加一階並賜勲兩轉其諸色支供作官司直
長上流外灼然要職掌者並賜勲兩轉行事室長掌

生齋郎禮生贊者減二年勞無勞可減者簡選口優
與處分崇賢館學生見在者減帖策各一道國子監
陪位學生賜勲一轉介公鄴公各與一子官如無子
孫賜物一百匹神策六軍殿前左右射生英武威遠
皇城左右金吾街使將士應緣大禮宿衛御樓立仗
及守本庫本營者其賜物若干端足天災作沴深徹
予衷跼躄憂慚罔知攸措今穀價騰踊人情震驚鄉
閭不居骨肉相棄流離殞斃所不忍聞公私之間廩
食俱闕既無賑恤又復徵求財殫力竭繼以鞭箠弛
征則軍糧乏贍厚取則人何以堪念茲困窮痛切心

隆宣公奏議 卷之二
骨思所以濟浩無津涯補過實在於增修救患莫如
於息費致咎之本既由朕躬謝譴之誠宜自朕始宜
令尚食所進御膳每日各減下一半應宮人等每月
惟供給糧米一千五百碩飛龍廐馬從今已後至三
十日已前並減一半料京兆府應差科百姓及和市
和買等諸色目事無大小一切並停公私債負容待
蠶麥熟後徵理

